

# Titus

## Paul-ele ayeye nhenhe artwe Titus-eke intelhe-ileme

<sup>1</sup> Ayeye nhenhe anteme the Paul-ele intelhe-ileme Titus ngkwenge. Ngkartele ayenge ileke Ikwerenhe warrke akwete mpwarerle-anetyeke nhenge ayeye akngernentye akngerre Ikwerenhe-arteke. Re ayenge ileke Jesus Christ-eke angketyeke. Yanhe arratyete anthurre-arle. Ngkartele tyerrtyete areye akngakeme Ikwere-werne atheke-ilemele. Re ayenge ileke alhetyeke tyerrtyete areye akaltyete-anthetyeke nhenge itne Renhe arratyete itelaretyeke, nhenge itne akaltyete-irretyeke ayeye arratyete Ikwere-akerte. Kele nhenge itne akaltyete-irreme ayeye arratyete Ngkarte-akerte, kele itne arratyete mwerre anteme anetyehenge Ikwere. <sup>2</sup> Ngkarte tyerrtyete areyete urrtirretyakenhe, arrangkwe-arle. Lyetenyenge akwele, urreke Re apmere ahelhe nhenhe mpwaretyehenge, Re alakenhe ilelheke, “Angwenhele apeke Ayenge arratyete itelaremele, arratyete mwerre Atyenge aneme, tyerrtyete yanhe re Atyengenge akwete-ante anetyenhe.” Yanhe arratyete anthurre-arle. Nhenge tyerrtyete angwenhe ayeye arratyete yanheke akangkwe-irremele aneme, kele itne Ngkartenge itethe akwete-ante-arle anetyenhe. <sup>3</sup> Ngkartele-arle anwernenhe itetheke mpwaremele arntarnte-areke. Urreke awerne anteme, Re ilelheke, “The anteme Ayeye Arratyete

anthurre Atyinhe anteme imerneme tyerrtye itneke.” Kele, yanhe ipenhe anteme Ngkartele ayenge ileke alhetyeke ayeye arratyete Ikwerenhe tyerrtye arrpenhe areyeke iletete. Itne ayeye arratyete renhe itelareme tharle itnenhe akaltyete-antherlenge. <sup>4</sup> Titus, unte Ngkarte renhe arratyete itelaremele awemele anepaneme ayenge-arteke. Alakenhe ikwerenge anteme unte alere atyinhe-arteke. Ayenge Ngkarte uthene Jesus Christ utheneke angkeme ngkwenge, Rarle anwernenhe itethe-ilemele mwan-tyete arntarnte-aremele atnyenetyeke. The ikwere-atherre apayuthneme ngenhe mwantyele arntarnte-aretyeke unte-arle mwerre anthurre awelhetyenhenge.

*Paul-ele Titus-eke intelhe-ileme tyatyete-ke akngerrepare areye akngakeme-akerte*

<sup>5</sup> Titus, nhenge ayenge-arle ngkwengenge arrekwele aneke apmere Crete-le, the war-ke akngerre atyinhe ingkirreke uyerrelhe-iletakenhe tyatyete yanhele. Alakenhe ikwerenge anteme the ngenhe imperle-alheke nhenge unte anteme warrke akngerre renhe akwete mp-waretyenhenge iwenhe apeke renhe arratyelhe-iletete yanhe ikwerele. The ngenhe ileke tyatyete arrpenhe yanhe areye-werne alhetyeke, akngerrepare areye akngaketyete tyatyete anyenteke-anyente arrpenhe ikwere. The ngkwenge arrekwele kele ileke nthakenhe tyatyete-ke akngerrepare itnenhe akngaketyete. <sup>6</sup> The ngenhe tyatyete-ke akngerrepare areye-akerte alakenhe

ileke: Urreke tyatye-ke akngerrepate irretyen-henge, re mwerre-arle anetyeke, nhenge tyerrtye arrpenhe areyele renhe akurne-akurne ileketye. Re anewe anyente-akerte anetyeke. Ampe ikw-erenhe areyele Jesus arratye itelaretyeke, itneke-artweye akangkwe-irretyeke aneke, nhenge tyerrtye arrpenhe areyele itnenhe arerte, anhelhentye akngerre apeke ileketye. <sup>7</sup> Tyatye-ke akngerrepate areyele tyerrtye Ngkarte-arenye ingkirreke mwantyele arntarnte-aretyeke tyatye ikwerele. Alakenhe ikwerenge anteme tyerrtye angwenhe apeke ahentye-anemele tyatye-ke akngerrepate anetyeke, re arratye mwerre anetyekeke-amparre arrpenhe areyele renhe akurne akeketye. Re tnakelhetyale anetyeke, tyerrtye arrpenhe areyele uternetyakenhele. Re iwerre ikwerenhe-arrpeke akwetethe ahentye-aneme mpwaretyale anetyeke, iparrpele ahele-irretyale anetyeke. Ngkwarle akngerre antywetyale anetyeke, akweke ware apeke, re arerte anthurre irretyale anetyeke. Re ahele-irretyale anetyeke, atwentye akngerre-kwenye anetyeke. Re tyerrtye arrpenhe areyeke uryirretyale anetyeke nhenge itnekenge apwerte akngerre inetyenhenge. Tyerrtye apeke alakenhe akurne aneme kele re tyatye-ke akngerrepate anetyakenhe-arle aneme, arrangkwe-arle. <sup>8</sup> Nhenge angwenhe apeke tyatye-ke akngerrepate anetyeke ahentye-anemele, re kele ipenye areyeke-arlke akangkentye anetyeke, itnenhe ikngwemele apmere ikwerenhe-werne anetyeke. Re arne mwerre areyeke-ante ware itirremele anetyeke. Re arne akurne areyeke itirremele

anetyale. Re mwerrentye anetyeke, tyerrtye arrpenhe areyeke-arlke mwerre anetyeke, aratyentye anetyeke Ngkarteke. Re ayakelhetyeke akurne areye mpwareme-ketye. <sup>9</sup> Nhenge angwenhe apeke tyatye-ke akngerrepate anetyeke ahentye-aneme, arrekwele anteme re ayeye Jesus-kenhe awetyeke, ayeye anyente renhe antime-arle ilerne akaltyele-antheke tyerrtye apmere Crete-arenye areye. Nhenge tyatye-arenye nhengele apeke ayeye arratyete Jesus-akerte yanhe apeke mwantye-mwantyele atnyenemele, kele re alhetyeke tyerrtye arrpenhe areye-arlke anteme akaltyele-anthetyeke alheme arrpenhe yanhe areye Jesus-eke-arle akangkwe-irremeke. Re anteme angwenhe apeke renhe arratyete-ileme nhenge apeke-arle akurne angkemeke ayeye yanhe-akerte.

*Paul-ele Titus alknгарre-ileme akaltyele-anthenhe-anthenhe akurne areye-ketye*

<sup>10</sup> Tyatye areye Crete-elarle tyerrtye atningke anthurre mwernte akngerre-arle anemeke, lterrke akwete aneke areye, itne-arle awetyakenhe aneme, tyerrtye arrpenhe areyeke akangkwe-irretyakenhe. Itne-arle akwetethe anthurre ayeye akurne areye ileme tyerrtye arrpenhe areyeke. Itne tyerrtye arrpenhe areyeke urrtirremele. Akaltyele-anthenhe-anthenhe atningke Jew-arenye-arle, nhenge areye akengentye-arle angkemeke artwe ingkirreke artwe-irretyeke angkentye akngerre Jew-kenhenge ularre. <sup>11</sup> Titus, unte

alhetyeke Jew-arenye yanhe areye ntertelhe-iletieke! Itne-arle tyerrtye arrpenhe areye ayeye akurne-arle akaltyele-antheme. Tyerrtye Ngkarte-kenhe areye ayeye akurne alakenhe areye iletiale anetyeke! Jew-arenye Ngkarte-kenhe yanhe areyele-arle akwele ayeye alakenhe arrpenhe areyeye ilemele ware-arle nhenge itneke urrtiyirremele itne apwerte ngkweltye itnenhe anthetyenhenge. Kele itne itnenhe urrtiekele-iwerlenghe alakenhe mpwareme-arle. Alakenhe ikwerenge itne tyerrtye atningke areye itneke-artweye-arlke untyemelhe-ileke Jesus-enge. Akngeye-arlke, meye-arlke, ampe akweke areyele-arlke ayeye akurne yanhe areye awemele itne anteme untyemurle-irreke Jesus-enge. Alakenhe ikwerenge anteme unte alhetyeke Jew-arenye yanhe areye ntertelhe-iletieke, yanhe areyele-arle ayeye akurne ilerlte-apemeke. <sup>12</sup> Arrule anthurre ayeye ilentye akngerre anyente Crete-arenye alakenhe angkeke, "Tyerrtye Crete-arenye areye akwetethe anthurre urrtiyirremele-arle ileme. Yanhe areye akurne anthurre, anhelhentye ahe-akngerre anthurre aneme. Yanhe areye-arle warrke mpwarentye akngerre-kwenye areye-arle, itne aname-atheke anthurre areye. Itne-arle anerlte-aneme merne uthene kere akngerre uthene arkwemele akwetethe!" Alakenhe-arle ayeye ilentye akngerre re angkeke. <sup>13</sup> Yanhe arratyeh anthurre-arle! Tyerrtye Ngkarte-kenhe atningke anthurrele Crete-nge iwerre akurne apenterlte-aneme. Titus, itnenhe alkngarre-ilaye, rlterrke anthurre

itneke angkemele. Itnenhe ilaye itne-arle akurne mpwaremele aneme. Itneke ayeye arratyentye awethe ilaye Jesus Christ-akerte nhenge itne Renhe arratyete itelaretyeke. <sup>14</sup> Ngkarte-kenhe Jew-arenye arrpenhemele ayeye arrulenyete itnekenhe ware ileme. Kenhe arrpenhe areye ayeye Jesus-kenhe-ngentyete untyeme-irreke-arle ayeye arratyentye anthurre ikwerenge. Itne alakenhe ileme, Ngkarte-kenhe anewe-kwenyete areye akwele anewe aketyeke arrangkwe-arle. Itne awethe alakenhe ileme, Ngkarte-kenhe areyete akwele merne arrpenheme arlkwetyeke arrangkwe-arle. Titus, Ngkarte-arenye arrpenhe areye ilaye itneke akangkwe-irretyeke arrangkwe-arle. <sup>15</sup> Nhenge angwenhele apeke iwerre Ngkarte-kenhe arratyentye apentemele, kele tyerrtyete yanhe areye re merne iwenhe apeke renhe ingkirreke-arle arlkwetyeke. Kenhe tyerrtyete angwenhe apeke itirremele arne akurne-akerte ware, Jesus arratyete itelaretyakenhe, itne akutne akwete arne iwenheke-arle arratyentyete mwerre anemele apeke, arne iwenheke-arle akurne anemeke apeke. Tyerrtyete alakenhe areyete, itirrentyete itnekenhe akurne akwete-arle, arne ingkirrenyete anthurre itne mpwareme akurne anerlenge. <sup>16</sup> Itne akwele angkeme itne-arle Ngkarte itelareme akwele, kele imerte itne akwete-arle arne akurne areyete mpwarerlitate-anemele. Nhenge itne akwete arne akurne yanhe areyete mpwaremele, Ngkarte itneke akangkentyete anetyakenhe. Itne Renhe awetyakenhe aneme, kele itne warrke mwerre

mpwaretyakenhe-arle Ikwere. Alakenhe ikwerenge anteme tyerrtye yanhe areye Ngkarteke akutne akwete aneme arratyete.

## 2

*Paul-ele Titus akaltyele-antheme nthakenhe-akenhe tyerrtye areye arratyentye anetyeke Ngkarteke*

<sup>1</sup> Titus, arratyentye akwete ilemele itnenhe akaltyele-anthaye ayeye arratyentye ikwerele Ngkarte-kenhe areye apmere Crete-elarle anemeke nhenge itne arratyete mwerrentye Ngkarteke anetyeke. <sup>2</sup> Nhenhe anteme unte artwe ampwe areyeke alakenhe iletaye, “Artwe ampwe areye, mwantye-mwantye nterte ware anerrirraye nhenge tyerrtye arrpenhe areyele arrenhantherrenhe aretyenhenge arrenhantherrenhe mwerre aketyenhenge. Ayakelhaye iwerre akurnele alheketye Ngkarte-ketyenge. Jesus arratyete akwete itelaraye. Ngkarteke akwete ahentye-anaye tyerrtye arrpenhe areyeke-arlke. Akurne arrekantherre irretyenhe apeke. Kele mwerre-arle. Iwerre Jesus-kenhe akwete apenterlte-anaye.”

<sup>3</sup> Titus, alakenhe re antime angkaye arelhe ampwe areyeke. Itneke alakenhe angke, “Arelhe ampwe areye, arrantherre-arle kele anhelhewarreke Ngkarte-werne-atheke, arrantherre Ikwerenhe anteme aneme. Alakenhe ikwerenge anteme arrantherre mwantye-mwantye anetyeke Ikwere. Tyele angketyale tyerrtye arrpenhe areyeke, ngkwarle

akngerre anthurre antywetyale. Marle awenke areye mwantyele akaltyele-anthaye arne mwerre areye-akerte-ante ware. <sup>4</sup> Marle awenke itnenhe akaltyele-anthaye arne mwerre areyeke-arle anewe itnekenhe-arlke mwantyele arntarnte-aretyeke, ampe akweke itnekenhe-arlke. <sup>5</sup> Itneke alakenhe angke, ‘Marle awenke areyaye, arternpe-irremele anetyeke iwerre akurne-arle alhetyale arrantherre Ngkarte-ketye untyeme-irreketye. Artwe arrpenhe areyenge-arlke intetyale. Apmere ngkwinhenge warrke mwerre mpwaraye. Tyerrtye arrpenhe areye mwantye-mwantye-ilemele anaye. Anewe ngkwinkehe akangkwe-irraye ikwere warrke mpwaremele.’” Alakenhe renhe-arle arelhe ampwe areyele awenke akweke itnenhe ilettyeke. Kele arelhe awenke nhenhe areye apeke iwerre arratyentyele alakenhele aneme, kele arrpenhe angketyakenhe-arle aneme nhenge angkentye Ngkarte-kenhe-arle akurne anemeke. <sup>6</sup> Titus, alakenhe akenhe angkaye artwe akwerrke areyeke, alakenhe itneke angkemele, “Arrantherre ingkirrenyeke anthurre anyenteke-anyente impelhetyeke iwerre akurne-arle alhetyale Ngkarte-ketye.” Unte itneke alakenhe angketyeke. <sup>7</sup> Titus, nhenge unte apeke artwe akwerrke areyenge anemele, arratyentye anaye nhenge itne ngenhe aretyenhenge mwerre areye mpwarerlenge anemele. Unte ayeye Ngkarte-kenhe akaltyele-anthemele arratyentye renhe ilettyeke. Kele itne antemele ngenhe apentetyenhenge, kele imerte itne antemele-arle mpwaremele. <sup>8</sup> Nhenge unte itnenhe



akaltyele-anthemele, ayeye arratyentye-ante itneke angketyeke. Kele arrpenhe areyele ayeye ngkwinhe akurne aketyeke arrangkwe-arle. Kenhe tyerrye arrpenhe areye ngkwenge akurnentye angkerlenghe, itneke angkentye arratyentye-ante ware akwete angkirtnaye. Kele nhenhe ipenhe anteme itne akurne angketyeke arrangkwe-arle anwerne-akerte, itne anteme apure anthurre irretyehenge.

<sup>9</sup> Titus, nhenhe anteme tyerrye areyeke ilaye warrke-irrerlenghe-arle areye ilyelaye-irretyehenge: “Arrantherre alartetye arrekantherrenhe areyeke mwantye awemele anetyeke nhenge itne arrenhantherrenhe ilerlenghe warrke mpwaretyeke. Arrantherre akwetethe arnterre warrke-irremele anetyeke alartetye arrekantherrenhe areye arrekantherre akangkemele anetyehenge. Alartetye arrekantherrenhe areyeke ahele angkirtnetyale.

<sup>10</sup> Arne areye alartetye arrekantherrenhenge anyelknghele inetyale. Nhenge alartetye arrekantherrenhe apeke arrekantherre ileme warrke arrekantherrenhe mpwaremele uyerrelhe-ilemele anetyeke nhenge arne areye apeke mwantyele arntarnte-aretyeke, arrantherre warrke renhe mwerrentye mpwaretyeke uyerrelhe-ilettyeke, arne areye mwantyele arntarnte-aretyeke. Kenhe yanhe ipenhe anteme itne arrenhantherrenhe arratyete itelareme, arne itne-kenheke itirretyakenhe anteme aneme.” Alakenhe renhe anteme unte urrkapentye akngerre areyeke angketyeke. Yewe, warrkene yanhe areye warrke mwerre

mpwaretyeke nhenge tyerrtye arrpenhe areyele itnenhe aretyenhenge. Nhenge tyerrtye arrpenhe areyele itnenhe areme warrke mwerre mpwarerlenge, kele itne atheke-atheke-irretyenhenge ayeye Ngkarte-akerte awetyeke anwerne-arle itnenhe akaltyele-anthemeke. Ayeye akngerre yanhele Ngkarte-akerte Rarle thewe anwernenhe mwantyele atnyenemeke, itetheke mpwaremele.

*Ngkartele akurne areye tyerrtye areyenge ur-  
rpareme itnenhe itethe-ilemele*

<sup>11</sup> Titus, the ngkwenge ileke-arle Jesus-kenhe areye iwerre arratyentyele anetyeke Ngkarteke. Iwenheke-ame anwerne iwerre arratyentyele anetyeke Ikwere? Alakenhe renhe the ngkwenge ilettyeke ahentye-aneme lyete. Ngkarte anwerneke ingkirrenyeyeke ilkelheme. Alakenhe ikwenge anteme Re Jesus apmere ahelhe nhenhe-werne yerneke Re tyerrtye ingkirreke-ngentyele akurne urrparetyeke anwernenhe ingkirreke itetheke mpwaretyenhenge. <sup>12</sup> Ngkartele anwernenhe akwetethe anthurre akaltyele-antheme iwerre mwerre akwete apentetyeke. Ngkarte arne akurne areyeke ahentye anthurre anetyakenhe, alakenhe ikwenge anteme anwerne akurne itnenhe impetyeke. Anwerne itirrentye akurne anwerne-kenhe impetyeke. Alakenhe arraty anthurre, anwerne ameke-arelhetyeke arne akurne areye mpwareme-ketye, anwerne akwete itirretyeke iwerre mwerrele akwete alhetyeke Ngkarteke lyete. Alakenhe-arle

Ngkarte anwerneke angkeme. <sup>13</sup> Jesus Christ-arle Ngkarte anwerne-kenhe, Re mwerre akngerre anthurre aneme. Rarle thewe anwernenhe itetheke mpwareme-arle. Lyete anteme anwerne iwerre arratyentye akwete anetyeke Ikwere-ante, anwerne Ikwere akarelhemele apmere ahelhe nhenhe-werne apetyalpetyeke. Alakenhe arraty anthurre. Anwerne itelareme nhenge Jesus apmere ahelhe nhenhe-werne apetyalperleng, Re rlterrkele apetyetyenhe. Nhenge anwerne Renhe aremele apetyerleng, anwerne arraty anthurre apatewarretenhe rarle mwerre akngerre anerleng. <sup>14</sup> Jesus anhelheke arne arntarkweke-arleke ilwetyeke, arrpenhele renhe uternetyakenhe. Re anwerneke aywerrke ilweke anwerne Ikwere akwete-ante anetyeke. Re anwerneke piwelhemele ilweke anwerne arne akurne areye awethe mpwarewarreketye. Re akurne anwerneke-ngentyele urrpareke, anwernenhe arlkgemele akngakeke Ikwerele-arleng anwerne anetyenhenge. Alakenhe ikwerenge anteme anwerne iwerre arratyentyele alhetyeke, mwerrantye akwete Ikwere anetyeke.

<sup>15</sup> Titus, Jesus-kenhe areye apmere Crete- nge akaltyele-anthaye ayeye arratyentye tharle ngenhe antheme pipe nhenheke-arle intelhe- ilemeke. Itnenhe ilaye itne-arle ayeye akngerre nhenhe areye arratyentyele akwete apenterlte- apetyeke. Tharle ngenhe angkentye nhenhe areye antheke. Alakenhe ikwerenge an- teme, angwenhele apeke ayeye nhenhe-ketyenge tyenelheme, ngenhe awetyakenhe apeke, kele

itnenhe iltetyeke itne anteme alknge arelhemele ngkwenge akangkwe-irremele anteme-arle. Itnenhe irlpe artepele awaye, nhenge itne angkerlenge unte-arle apelkele-arle angkeme.

### 3

*Paul-ele anteme Ngkarte-kenhe areye ileme apmere Crete-elarle anemeke iwerre arratyentyele alhetyeke Ngkarte-werne-atheke*

<sup>1</sup> Titus, akwete anthurre Ngkarte-kenhe areye irlpangkelhe-ilaye nhenge itne akwetethe awetyeke alartetye government-kenhe areye-arlike apmereke-artweye areye-arlike, itneke mwernte-irretyale. Itne akwete itneke akangkwe-irretyeke. Arrpenhele itnenhe apeke warlike antheme mpwaretyeke, kele itne aywerkele mpwaretyeke renhe uyerrelhe-ilemele anetyeke. <sup>2</sup> Ngkarte-kenhe areye ilaye itne-arle tyerrtye arrpenhe areyeke tyele angketyeke arrangkwe, itne ahele-ahele-irremele anetyale, atwerretyale anetyeke, arrangkwe-arle. Itne tyerrtye arrpenhe areyeke mwerre akwete anetyeke itnekenge mwantye-mwantye-ilerremele anetyeke, tnakelhetyakenhe anetyeke.

<sup>3</sup> Urreke anwerne Ngkarte-kenhe areye irrerirretyenhenge, anwerne akurne-akurne awerne areye antime aneke. Anwerne tyerrtye arrpenhe areye awetyakenhe aneke, arrangkwe-arle, nhenge Ngkarte-arlike awetyakenhe. Anwerne iwerre akurnele alhetyeke antime-arle Ngkarte-ketye. Anwerne-arle ayakelhetyakenhe arne akurne mpwareme-ketye, iwerre

akurne ikwerele akwete aneme-ketye. Alakenhenge anteme anwerne akwete itirretyarte arne akurne areye mpwaretyeke akwete. Anwerne akwele akangkentye mpwarelhetyeke ar-kernemele arne akurne areyele. Anwerne-arle akurne antime-arle aneke, tyerrtye arpenhe areyeke-arlke ingkerte-ingkerte-irremele anetyarte. Alakenhe ikwerenge anteme, tyerrtye arrpenhe areye anwerneke ahentye anthurre anetyakenhe anteme, anwerne ingkerrenyekeke ahentye anetyakenhe anteye. <sup>4</sup> Yewe, anwerne-arle iwerre akurnele-arle anetyarte Ngkartenge arlengele. Ngkartele anwernenhe atwemere anwerne-arle akurne mpwarerlenge. Kenhe Ngkarte Rarle thewe anwernenhe itetheke mpwareme. Anwerne akurne akwete mpwarekenge perre, Ngkartele anwernenhe itethe-ileke. Re anwerneke mwerre anthurre aneme, anwernenhe arntarnte-aremele atnyeneme. Alakenhe ikwerenge anteme Ngkartele Jesus apmere ahelhe nhenhe-werne yerneke. <sup>5</sup> Anwerne apeke uyarne anthurre akaltye-irreke iwerre mwerrele anetyeke Ngkarteke. Kenhe Re anwernenhe alakenhe ikwerenge kwenye-arle anwernenhe itetheke mpwaretyeke, arrangwe-arle. Re anwernenhe areke iwerre akurnele akwete-arle anerlenge, Re anteme anwernenhe mwantye-mwantye-ileke. Alakenhe ikwerenge anteme Re anwernenhe itetheke mpwareke ilweketyenge. Re akurne ingkerrenyeke arrentye Satan-kenhe anwerneke-ngentyele arratelhe-ileke, nhenge meyele-arle ampe akweke ikw-erenhenge ahelhe renhe alhewemenge kwatyale.

Kele ikwere ipenhele anteme Re Utnenge Mwerre Ikwerenhe kwene ikwere anwerneke-arleke akwernemele. Kele Utnenge Mwerre yanhengentyele anwerne inteke awethe anteme ampe Ikwerenhe areye-arteke anteme, Re anwernenhe arrerneme Ikwere-artweye areye anetyeke. Re anwernenhe arratye akeke anwerne anteme Ikwere arratye mwerre anerrirretyenhenge. <sup>6</sup> Yewe, Ngkartele Jesus yerneke anwernenhe itetheke mpwaretyeke ilweketyenge. Re Renhe yerneke nhenge Re Utnenge Mwerre anwerneke-arleke akwernetyenhenge anwernenhe mwan-tyele atnyenetyeke. <sup>7</sup> Ngkarte-arle anwerneke mwerre anthurre aneme, alakenhe ikwerenge anteme Re anwernenhe akngakemele ineke, anwernenhe arratye akeke. Alakenhe ikwerenge anteme Re anwernenhe Utnenge Ikwerenhe antheke. Re anwernenhe Utnenge Ikwerenhe antheke anwerne ampe akweke Ikwerenhe areye anetyenhenge nhenge anwerne itelaretyenhenge anthurre anwerne-arle Ikwerenge akwete-ante anetyenhenge.

<sup>8</sup> Titus, angkentye nhenhe tharle intelhe-ileke arratye anthurre-arle. Tyerrtye ingkirrenyeke anthurrele awerrirretyeke itne iwerre arratyen-tyele anetyenhenge. Kele arne ingkirreke nhenhe itnenhene atnerrele akaltyele-anthaye Ngkarte-arle awerrirremeke. Itnenhe akwete-arle akaltyele-antheme itne anteme mwerre anetyenhenge tyerrtye arrpenhe areyeke, itnenhe mwantye-mwantye-ilemele.

<sup>9</sup> Kenhe tyerrtye arrpenhe areye akenhe arerte-arerte akwete aneme. Itne ahele-ahele ak-

erremele ayeye areye arrekwelenye itnekenhengerntyele, arrekwelenye areye arritnye-akerte-arlike. Itne akwete ahele-ahele akerrremele uthnelhe-uthnelhe akwete ilerremele angkentye-akerte Jew-arenye areye-kenhe-arle. Nhenge tyerrtye areye alakenhe ahele-ahele akerrremele, re akurne anthurre-arle. Alakenhe ikwerenge itnekele-arlenge anetyale nhenge itne uthnelhe-uthnelhe-ilerrenge itne-ketyenge angwarel-hemele. <sup>10</sup> Tyatye ikwerele-arle, nhenge angwenhe apeke akwete angkeme ayeye arrulenyen yanhe areye-akerte, nhenge angkentye Jew-arenye areye-kenheke apeke, kele tyerrtye Ngkarte-kenhe arrpenhe areye anteme uthnelhe-uthnelhe-ilerreketye. Alakenhe-irreketye anteme, tyerrtye yanhe areye ilettyeke anyentengare, atherre-ngare apeke nterte anetyeke. Nhenge re apeke akwete angkemele, kele renhe ntertelhe-ilettyeke. Renhe ilettyeke tyatye akngerre kwenele-arlike angketyale anetyeke, renhe ipmentyele iwetyeke angketyale. <sup>11</sup> Titus, unte itelareme tyerrtye areye alakenhe-arle anemeke. Unte itelareme itne akurne anthurre-arle, arne akurne areye akwete mpwarerlenge. Tyerrtye ingkerrenyeken areme itne iwerre akurnele akwete alherlenge. Alakenhe ikwerenge anteme unte itnenhe ntertelhe-ilettyeke tyatye kwenenge angketyale anetyeke, itne-ketye ameke-aremele.

*Paul-ele pipe nhenhe Titus-eke uyerrelhe-ileke intelhe-ilemele*

<sup>12</sup> Titus, ayenge alhetyeke ahentye-aneme apmere akngerre Nicopolis-werne nhenge yanhele anetyeke alhwerrpenge. Urreke ayenge

alhetyenhenge apmere Nicopolis-werne, the artwe Artemas apeke yerneme artwe Tychicus apeke ngkwengele-arlenge anetyeke apmere Crete-le. Anyente angwenhe apeke apetyerlenge, unte arne ngkwinhe areye inetyeke iparrpe anthurre apmere yanhe impemele apmere Nicopolis-werne apetyemele ayenge yanhele aretye-alhetyeke. <sup>13</sup> Artwe Zenas court-arenye re, artwe arrpenhe Apollos arritnye, ratherre kele alhetyeke akarelherle-anerreme. Ratherre apeke apwerte ngkweltye-kwenye kele renhe-atherrenhe anthetyeke. <sup>14</sup> Ngkarte-kenhe areye Crete-arenye akwete akaltyele-anthaye, itne akwete urrakpemele arne mwerre areye mpwaremele akwete anetyeke. Itne-arle Ngkarte arratye itelareme anwerne-arteke. Itne tyerrtye akunye areye akwete arntarnte-aretyeke. <sup>15</sup> Tyerrtye ingkerrenyeke anthurre atyengenge-arle anemeke ngkwenge ilettyeke ahentye-aneme itne-arle mwerre aneme. Kenhe tyerrtye areye Crete-elarle aneme anwerneke-arle ahentye-anemeke, Jesus-arle arratye itelaremeke anwerne-arteke, itneke ilaye anwerne-arle mwerre anemenge. The Jesus anwerneke-artweye apayuthneme arrenhantherrenhe akwete arntarnte-aretyeke.

Kele yanhe ware ayenge angkerle-iweme.



**Angkentye Mwerre**  
**Portions of the Holy Bible in the Central and Eastern**  
**Arrente language of Australia**

copyright © 2002-2014 Wycliffe Bible Translators

Language: Eastern Arrente (Arrernte, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 11 Nov 2022 from source files dated 22 Nov 2019

26bd077a-984c-5596-a099-f37f2651f363